



Mariano Tschuor (direcziun generala da la SSR) e Martin Cabalzar (La Quotidiana).



Il parsura dal cussegl grond Michael Pfäffi ed il parsura dad SRG.R Oscar Knapp.



Da san. Arnold Spescha, Luregn Mattias Cavelt ed Aluis Maissen.



Cussegliera naziunala Silva Semadeni (a san.) e la directura RTR Ladina Heimgartner.



Delegaziun da l'Uniun Rumantscha da Surmeir: Filip Dosch (a dretga) e Gian Sonder.



Adina bun per ina surprisa: L'editur da La Quotidiana Hanspeter Lebrument durant ses pled.

FOTOS G. N. STGIER/M. HARTMANN

Unitad per avair in bun futur

Festa da giubileum 20 onns La Quotidiana ed Agentura da novitads rumantscha

DA GION NUTEGN STGIER / ANR

■ **Unir ils meds da massa rumantschs tar ina organizaziun saja indispensabel per avair en quel sector in futur. Quai è stà il facit da l'occurrènz da giubileum per las duas giubilaras. A pled è er vegnida Isabelle Chassot, la directura da l'Uffizi federal da cultura.** Per intginas uras è il foyer da la Chasa da medias Samedia a Cuira daventà in local da festa sunter ils numerus pleds da gratulaziun per las duas giubilaras. En preschientscha da blera prominènz politica, regionala, chantunala e naziunala è vegnì festivà il giubileum radund da dus «products» ch'èn da preschent da gronda muntada per la pressa rumantscha. Senza La Quotidiana nagina Agentura da novitads rumantscha (anr) e senza quella nagina gasetta dal di rumantscha. Quai è sa resultà tar l'occurrènz da giubileum.

In cler segn en direcziun servetsch public

Hanspeter Lebrument, editur ed iniziand da La Quotidiana, ha menziunà en ses pled ch'il mund da las medias scrittas saja oz signà dal murir da bleras gasettas. El spera dentant che quai na pertutgia betg La Quotidiana. Ils Rumantschs hajan il dretg dad avair gasettas e radio e televisiun en lur lingua, ha ditg l'editur da numerusas gasettas. Unir las medias rumantschas tar ina organizaziun saja l'unica soluziun per surviver, ha ditg Lebrument. La finanziaziun da quella organizaziun haja da vegnir reglada

naziunal, pertge dals pretschs per las gasettas e dals inserats vegnian memia paucas entradas. Cun unir ils meds da massa rumantschs fiss quai er in cler segn en direcziun Berna ed en direcziun servetsch public. I dovria però ina tscherta solidaritad da tuts, e cunzunt er ina pulita chapientscha per pudair realisar ina organizaziun unida per tut las medias rumantschas.

In augment tar il personal da l'anr

Martin Cabalzar, il schefredactor da La Quotidiana, giavischass magari in pau dapli avertezza e toleranza dals Rumantschs, cunzunt envers ils auters idioms ed a la finfinala er envers il rumantsch grischun. El ha en spezial er menziunà che l'anr e La Quotidiana lavurian cun in minimum da personal e finanziaziun cun in pitschen preventiv. Per Cabalzar è ina collavuraziun pli intensiva cun RTR e cunzunt er in augment tar il personal da l'anr necessaria.

Per Martin Gabriel, il president dal cussegl da fundaziun da l'anr, èsi evident che l'agentura haja dad ir cun il temp sche quai fetschia da basegn. Ina gruppa da lavur saja da preschent occupada cun il futur, las structuradas ed il concept da l'anr, ha menziunà Gabriel.

Er oz dovri personalitads

Oz na saja betg da sa dumandar quantas gasettas rumantschas che nus sappian anc sa lubir, mabain quantas gasettas che survivan anc en Svizra, ha ditg cusseglier guvernativ Martin Jäger. Er oz dovria

personalitads che tegnian ad aut la bandiera, che prendian l'iniziativa per instradar novaziuns u per adattar l'existent a novas pretensiuns. Ma cuntrari a la situaziun da pli baud existia uss er in'obligaziun statala da mantegnair e promover la lingua rumantscha! Or da questa collavuraziun tranter iniziativa instituziunala, statala e privata saja sa furmada avant ventg onns – cun grond sustegn dal maun public – l'anr e sin quest fundament haja er pudì sa sviluppar La Quotidiana en sia furma odierna, ha ditg Jäger.

Promover vinavant il rumantsch

La confederaziun haja er en l'avegnir da s'occupar culturalmain cun las minoritads, ha ditg Isabelle Chassot, la directura da l'Uffizi federal da cultura. Uschia saja segir che er a partir dal 2020 vegnia la promoziun dal rumantsch e da las medias rumantschas rinforzada, ha ditg il giast Berna. Er per la directura da l'Uffizi da cultura federal vegnian ils meds da massa rumantschs be a star sur l'aua cun s'unir tar ina soluziun per l'entira Rumantschia. Chassot ha er ditg che oz saja strusch pli pussaivel da renunziar a l'anr, ella che saja per la pressa rumantscha da gronda valur. Menziunà ha ella lura er la muntada dal rumantsch grischun per la pressa rumantscha ed insumma per bleras autras instanzas. Ina cooperaziun tranter las medias electronicas e las medias da print rumantschas saja per in bun futur pli che be necessaria, ha punctuà Chassot.



Ina gronda raspada ha assistì a las festivitads da giubileum da LQ e la anr.